



# Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 7

Dembele aser Bonmati nati  
Ballon d'Or agizükogo

Palestinian statehood ajanga  
Gaza rara tembangtsü: UN



VOL. XXII ISSUE NO. 341 (ADOK 341)

DIMAPUR

RASEMNÜ (WEDNESDAY)

RONGJUI (SEPTEMBER) 24, 20:₹ 5.00

## CANSSEA-i takhangba 5 agüja lungkak ait

**Dimapur, September 23, 2025 (TYO):** Confederation of All Nagaland State Services Association(CANSSEA) denallied service organizations-i Mongulbarnü Kohima nung mener lungkak aitogo.

All India State Government Employees Federation (AISGF)-i linük ajungalen lungkak aittsü ayongzükba ama tanü Nagaland nunga iba sentong ayonga agi.

"Tanü onoki lungkak aitba ya July 9 nungi tenzükba sentong methitemi agiba lir aser onok alizüngtem matong tashi agitsü" ta CANSSEA President Zubemo Lotha Tsanglao-i ashi.

AISGF-i national level nung takhangba 11 agütsüogo aser CANSSEA-i Nagaland dak sendakba takhangba pungu state sorkar nem agütsüogo ta Tsanglao-isa ashi.

CANSSEA-i State Pay Commission ka tenteta Eighth Central Pay Commission agütsütsü aser küm pungu shia pay revision asütsü akhanger.

Parnokisa Pension Fund Regulatory and Development Authority Act agentsü, NPS/UPS agentsü aser EPS-95 kübok subscribers ajak anioker fund managers dang state sorkar den senotsü enoka aliba meyipa agütsütsü tetuyuba agütsütsü akhanger.

CMHIS (Chief Minister's Health Insurance Scheme) kübok pensioners, regular aser contractual employees ajak cashless treatment sütettsüsa Health Insurance Scheme ka tenzüktsü aser empanelled district hospitals nung facility temtajungba akümtsü atema parnokisa takhangba agütsür.

March 10 vacancy sangdong nung aliba ama Nagaland nung IAS Cadre induction/selection atema transparent eligibility criteria mapa tenzükang ta CANSSEA-isa akhanger.

"Sorkari ola madoker aser onok nem telangzüba magütsür. Iba amai dang ora sorkar ketdangsübaren junga aliba ya tamakok ajurutsü akok. State sorkari Nagaland nung sorkar mapa inyakterem aser senotem ajungtsü atema OPS tenzüktsü lenmangtem bushitsüla" ta Nagaland National Pension System Government Service Employees Forum President Avizo Nienu-i ashi.

NPS-OPS melentsüba ya centre sorkar teyari nüngdaker saka senotsü peria aliba state kar nungbo OPS tenzükogo ta Tsanglao-ia ashi.

AISGF-i PERDA Act meyipa agitsü aser linük ajungalen NPS agentsü akhangba nung CANSSEA-i maneni pusema nungittsü ta paisa metetdaksü.

## NSDMA-i emergency numbers metetdaksür

**Dimapur, September 23, 2025 (TYO):** Nagaland nung lendongtsüdong atalokdang nübortem yaritsü atema State Emergency Operations Centre (SEOC) nung emergency numbers enoksemogo.

Nagaland State Disaster Management Authority (NSDMA), Home Department-i mepishiba ama SEOC nung emergency numbers enok.

Rongdak mapang SEOC ya osang bendentsü aser prokshitsü atema central hub lir. COVID-19 wara, Ukraine & Manipur tensa aser tsüngsang-mopung majungdang SEOC-i tangar den

amalitepa yaritepa liasü.

SEOC 24x7 nung NSDMA personnel aser officers alitsü ta NSDMA Emergency Contacts-i metetdaksüogo.

Lendongtsüdong mesüra rongdak mapang nübortemi tsünglanglen agüja aliba contacts den tongteptsü ayongzüker ta Additional Secretary Sentiwapang Aier-i sangdong ka nung metetdaksüogo.

**Official numbers:**

1. 1070 (Toll-Free)
2. 112 (ERSS for Disaster Management)
3. 0370-2291120
4. 0370-2291122

## Mizoram nung koya ajanga timtem agütsür

**Aizawl, September 23, 2025 (Agencies):** Mizoram kübok Mamit district nung koya ajanga yimtsüng 15 nung timtem agütsür. Iba tesem ya Bangladesh aser Tripura anasa lir.

Iba ya "Thingtam" ayawara den sendaktepa lir. Aou (Bambusa tulda) nung naro apongba ajanga koya aika züina akümer ta ketdangsürtemi ashi. Mizo nungeri iba dang 'rawthing' ta ajar.

Phuldungsei, Kawnmawi, Lallen, Saithah, Rulpuihlim, Khawrihnim, Reiek, Lungphun, Kanghmun, South Sabual, Hmunpui, Pukzing, West Phaileng, Parvatui aser Pukzing Vengthar yimtsüngtem nung koya kanga züina akümba osangtem angazükogo ta District Agriculture Officer (DAO) Ngurrinsanga Sailo-i ashi.

"Agriculture ketdangsür telok balala aluyimertem aser village council tanishirtem dang rodenticides amshiyim sayutsü atema yokogo. Koya aliba tesemtem nung onoki tekaraba nung rodenticides bener yoker" ta Sailo-i ashi.

Meta talang pilar alidak village council tanishirtem dangi indangindanga rodenticide bener yokogo, ta paisa ashi.

Külen, tzünglu kanga aruba ajanga tensa tamajungba kümogo kechiyong tekong lu nung ai kanga meyia lir. Iba ajanga koyatemi tsünösenbongtsü achir ta Sailo-isa ashi.

Mizoram kübok Lunglei district nung anogo ishika tejaklen koya ajanga tsük aser soybean alutem amakba sülen Mamit nung kasa timtem ajurur.

## Kohima district nung Gas Pipeline Project reprangdanga senzü

**Dimapur, September 23, 2025 (TYO):** Kohima Deputy Commissioner B. Henok Buchem, NCS-i anir ketdangsürtemi Kohima district nung natural gas pipeline enokba tesemtem sema senzüogo.

Nagaland nung iba mapatong 40% tashi December 2025 nung tembangtsü imlar aser completion deadline March 2027 tashi atsülangogo ta IGGL ketdangsürtemi ashi. Tetsükdaksü balala ajanga contractor temi mapa shitak inyaka mouteter ta parnokisa ashi.

Tanü site inspection mapang NHIDCL aser IGGL tsüngda mangatettep onük kar aliba angatettepogo.

"Alinük majungba aser yimtsüngtemi arentaka bilemba ajanga iba pipeline ya NH ROW tenemlen enoktsü aser tzüngluruwa mapang mapa manentsüla kechiyong Kohima

nung küm piyong tzünglu arur" ta Kohima DC-i ketdangsürtem dang ashi.

Iba mapa inyakba nung aser contractor-i nübo peria melemzükba atema temulung masür ta paisa ashi. Idangji contractor-i pipelines enoktsü atema nübo talila agütsütsü nangzük. Paisa October 31, 2025 tashi nung re-route alignment aser NH nung ROU alidak pipelines enokba mapa tembangtsü ta ashi.

Kohima DC-isa contractor tem dang tzünglu arudang mapa methitemi inyaksü atema lenmang bushiteptsü aser mapang shitak nung mapa tembangtsü ayongzük. Iba mapatong nung district administration-i pusema nungittsü aser tenük yoktsü ta paisa metetdaksü.

Deputy Commissioner-i anir inspection team ajanga nüngdaka aliba ama mapatong inyakba

reprangshiba atema pelar ta IGGL ketdangsürtemi ashi.

North East India nung Hydrocarbon Vision 2030 kübok North-East Gas Grid Project ya shisateta tenzük. North East nung energy infrastructure aser connectivity tajungba akümtsü nükjidong nung iba mapatong tenzük ta ketdangsürtemisa metetdaksü.

September 23, 2025 nü Kohima DC den Revenue Officer Kohima Kevingoto Kulnu, SDO Sechü-Zubza Imliakum Sanglir aser General Manager Indradhanush Gas Grid Limited (IGGL) nungeri tesem balala reprangdanga senzü.

Parnok den külemi IGGL aser Department of Geology and Mining, DPRO Kohima ketdangsürtem den North-East Gas Grid (NEGG) Dimapur-Imphal Pipeline Project, NHIDCL nungi contractors aden.

## RMSA-2016 tesayurtemi lungkak aitba anena atar

**Kohima, September 23, 2025 (TYO):** Nagaland RMSA-2016 Teachers' Association (NRMSATA)-i tanü agi anogo 12 buba lungkak aita aru saka School Education Department den senden ka amenba sülen lungkak aitba anena atatsü lemtetogo.

Mapang telatet ka tsüngda RMSA-2016 tesayur 367-i akhangba onüktem reprangshimtsü ta sorkari ashiba nung ajemdaker lungkak aitba anena atatsü lemtet.

Mongulbar nikongdang Civil Secretariat nung Commissioner & Secretary, School Education, Kevileno Angami menden ser senden amen.

Iba senden nung Education Department aser Samagra Shiksha nungi ketdangsürtem, All Nagaland School Teachers' Association (ANSTA) teshimtet nübo aser NRMSATA sanen luden züngsemtem aden .

Sorkari School Education Department, Directorate of School Education, Samagra

Shiksha, Finance Department, aser Justice & Law Department nungi nübotem dena High-Level Committee ka tentettsü lemtetogo.

Maneni iba committee nung ANSTA aser RMSA-2016 nungi teshimtet nübotem dendaksütsü. Tang atema Secretary, School Education-i anir Sub-Committee ka tenteta atatsü. Iba committee nung DoSE, Samagra Shiksha nungi nübotem, ANSTA nungi nübo ana, aser NRMSATA nungi nübo asem adentsü.

## COPU-i Wazeho mini cement plant semdang

**Dimapur, September 23, 2025 (TYO):** Dr. Sukhato A. Sema menden ser Committee on Public Undertakings (COPU)-i Wazeho nung Mini Cement Plant (MCP) semdangogo.

COPU-i September 17 aser 18 anogo ananü tashi Mini Cement Plant indang jenjang asadanga liasü.

Parnoki mapatong ana- 150 TPD Mini Cement Plant (MCP) aser Decorative & Dimensional Stone Plant (DDSP) semdanga liasü.

November 12, 2024 nü Memorandum of Understanding ka nung sign sütepba sülen MCP ya M/S Ramung Enterprises nem küm 30 atema leased süogo ta NSMDCL ketdangsürtemi ashi.

Iba plant nung machinery tejentem yanglushiogo saka tsüngsang majungba agi October ita nungi trial production metenzükteter ta ketdangsürtemisa ashi.

Iba tesem nung local lime

deposit ya North-East nung tajungtiba rongnung ka lir aser 43-grade quality cement yangluteter ta parnokisa Committee züngsemtem dang ashi.

Ketdangsürtemisa Committee züngsemtem dang cement production indang demonstration ka sayua liasü.

COPU züngsemtemi Wazeho nung Decorative & Dimensional Stone Plant (DDSP) nungbo interlocking bricks aser hollow block bricks jungjunga yangluba anguba osang metetdaksü.

Committee züngsemtem aser ketdangsürtem olemtepdang inland waterways indang jembi. Iba ajanga Burma o tanga Southeast Asian markets dena kidanger linüktem dangi cement products yokba nung teyari tulu angutsü ta parnok tebilemba lemsatep.

Committee on Public Undertakings (COPU)-isa Wazeho nung Administration

Office ka lapoktsü nüngdak ta ajitetba lemsatep.

M/S Ramung Enterprises-i 43-grade cement yanglutsü atema trial production aser DDSP maparen inyakba nung temulung asür ta COPU-i metetdaksü.

MLA & Advisor Z. Nyusietho Nyuthe, district aser police ketdangsürtem, Department of Geology & Mining, aser NSMDCL ajanga teyari agütsüba atema parnokisa pelaba shisem. Chief Minister-i state revenue angutsü atema MCP asentenshia lapoktsü nung yaritepba aser NLA Speaker-i study tour aotsü temelaba agütsüba atema Committee-isa pelaba metetdaksüogo.

COPU telok nung Committee Member Dr. Neisatuo Mero, special invitee MLA & Advisor New & Renewable Energy Z. Nyusietho Nyuthe, aser Nagaland Legislative Assembly Secretariat nungi ketdangsürtem aden.





All India State Government Employees Federation (AISGEF) teloki anir state ajunga nung state government mapa inyakterem nem Pension benefit shitak agütsütsü, government mapa nung contract mapa nung shima alirtem ajak regular kümtsütsü aser tang nungi contract nung inyakterem meshimtsü, State pay Commission shimtsü, mozü ki ajak nung pensioner-tem asoshi Health Insurance alitsüla, New Educational Policy toktsütsüla, tamangba yimsü ajak akümtsübuttsüla aser tenzükerem nem senötsü tagütsütsü tim magütsüi alibatam agütsütsüla ta linük ajaklen takangba agüja amongba sentong nung, Kohima nunga Confederation of All Nagaland State Services Employees Association (CANSSEA) purtema shilem agia mungogo. Iba anogo nung Nagaland government nema AISGEF teloki akangba nüngdaktem metetdakja CANSSEA lenirtemi Chief Secretary ajurua agütsüoggo. Iba mapang Nagaland Chief Secretary den CANSSEA lenirtem külemi agiba noksa ka yangi angur. (Kohima, Sept.23, 2025.)

## Dimapur nung ROJB indang workshop ka tenzükögo

**Dimapur, Rongjui/Sept. 23 (TYO):** Japan International Cooperation Agency (JICA) teyari nung Resource Organization on Jhum and Biodiversity (ROJB) indang ananü workshop sentong ka Hotel Acacia, Dimapur nung September 23, 2025 nü tenzükögo aser September 24 nü tembangtsü.

Iba workshop tenzüköba sentong nung Dr. Dharmendra Prakash, IFS, Principal Chief Conservator of Forest & HoFF and CPD, NFM menden liasü aser Rev. Vilodi Sakhnie, Pastor, Town Baptist Church, Dimapur ajanga sarasadema tenzüköba aser M. Senthil Kumar, IFS, Addl. PCCF & Project Director (HRD & RE) ajanga pela agizükba o jembia liasü.

Iba inaugural session atema melepzüng o ya Dr. Prabhat Kumar, IFS, CEO, ROJB Nagaland ajanga jembidang stakeholders, shisalen sayur aser kin balala nungi teshimtet nisungtemi shilem tajung agiba asoshi pelaba lemsatepa liasü.

Chief Representative of JICA India, Takeuchi Takuro-i iba sentong nung jembidang iba sentong ya Nagaland indang forestry sector asoshi alizüng ka lir ta ashi.

Jhum cultivation aser tesem ka nung takum aliba ajunga wazüka ayuba dak sendakba tebilemstü koktettsü atema ROJB ya shisatsü tesepe ka ama

asütsü, ta pai ashi.

Pai Nagaland Forest Management Project (NFMP) ajanga takok balala anguba indang lemsatepeba mapang, ali tasazük 38,000 hectares nung süngdong-lidong atemba aser nüburtum takum alitsü asoshi tashi itsütsü atema self-help groups 429 tentetba indang ashi aser tarutsü nunga JICA ajanga Nagaland den lungjemer inyakttsü ta shia liasü.

Advisor, Tribal Affairs & Election aser sentong akhumdong Tovihoto Ayemi-i sentong nung jembidang Department of Environment, Forest & Climate Change, project team, aser JICA ajanga bendanga agütsü iba inyakyim asangsang kumdaktsüba asoshi tenüngsang agüja liasü.

Pai tekong lu ayimba nung sobaliba, loktiliba aser tzi mopung den sendaktepa aliba rateta ashi aser iba yagi chiyongtsü wazüka ayur aser nüburtum sendaktepsü ta ashi.

Ali temu ajema akumba, biodiversity samaba nungi nokdangtsü asoshi tekeraba nung mera agitsü nüngdaker, aser iba atemaji ROJB ya tongtipang tesem ka asütsü, ta Ayemi-i ashi.

Advisor Tovihoto-isa ROJB indang official website aser logo sayatsü. Iba sentng nung Memorandums of Understanding (MOUs) ana zülutepe liasü.

Jayesh Bhatia, Managing Director of Intelcap ajanga Project Management Consultancy (PMC) mangdang lemsatepa liasü.

Iba workshop nung technical session pezü lemsar Dr. Vincent Darlong, Environmental Scientist and Deputy Chief Technical Advisor, Indo-German Development Cooperation; Supong, IFS, Chief Conservator of Forests (Environment, Biodiversity & Research); Amba Jamir, policy and development strategist; aser Jayesh Bhatia, MD, Intelcap nungeri jembitsü.

Sensaksemba nung Dr. David C. Vanlalfakawma (Mizoram University), Nagato K. Aye (NEIDA), Dr. Sachin Sharma (ICFRE-Arid Forest Research Institute), Dr. Jayanta Choudhury (Nagaland University), Prof. John Zothanzama (Mizoram University), Subrata Kumar Singh (Foundation for Ecological Security), Dr. Amit Kumar (Wildlife Institute of India), Dr. Selim Reza (bamboo livelihoods expert), Dr. Aditi Tailor (ICFRE), Dr. Ramendra Barman (Fisheries Dept, Assam), Pravin Agarwal, IFS (Tripura cadre), Dr. Oinam Sunanda Devi (Assam State Biodiversity Board), aser Van Shanborlang Buhphang (MegLIFE) nungeri shilem agitsü.

## Dimapur nung Run 4 Green Dimapur Marathon ayongzüksü

**Dimapur, Rongjui/Sept. 23 (TYO):** Mopung menenba indang awareness agütsütsü aser tarutsü putu nung nüngdakba nung mokongshia tanü nüngdakba peria agitetba yimya amshitsü temaba jenjangi ajungketa Dimapur Municipal Council (DMC) ajanga District Administration, Dimapur Development Authority, Department of Environment and Climate Change, Nagaland Pollution Control Board, aser National Youth Climate Consortium den lungjemer September 27, 2025 nü Urban Haat, Old Dhansari Bridge nung Run 4 Green Dimapur Marathon ayongzüksü.

Iba sentong ya National Clean Air Programme (NCAP) küboki aittsü aser air quality tsütsü Dimapur ya "non-attainment city" nung züngshiba nungi agiendaktsütsü nükjidong nung iba sentong ya ayongzüker,

ta Thungchanbemo Tungoe, Chief Executive Officer, DMC ajanga ashi.

Asemtepeba den külemi süngdong-lidong atemba maparena inyakttsü.

Iba marathon ya MY Bharat platform den lirumedema asütsü, koba ajanga linük yangerba aser libajen wazüka ayuba nung lanur nem tashi agütsü, ta pai ashi.

Iba sentong nung Team Better Dimapur, Can Youth, aser Pro-Rural densema NGOs balalai yariteptsü, ta ashi.

Thungchanbemo Tungoe-isa nübür ajunga dang iba Run 4 Green Dimapur Marathon nung shilem agitsü ayongzüka liasü.

Asemtepeba telemsa Open (Tetsür/Tebur aser Junior (Tetsür/Tebur) alitsü, Open Category atema registration fee sen 300 aser Junior Category nung shilem agir dang registration fee memeshitsü.

## Chümou district nung angati skill training agütsütsü

**Dimapur, Rongjui/Sept. 23 (TYO):** Nagaland Skill and Entrepreneurship Development (NSED), IDAN, GoN ajanga sponsor süa Chümoukedima district nung alirtem atema angati Skill Training ka agütsütsü.

Iba training ya Electrician-cum-Plumbing; Masonry-cum-Tiling (Construction) nung ita ka atema agütsütsü aser Class 5

pass sür aliba aser iba dang tema zünger alirtemi agitettsü.

Training angati agütsüba den külemi tanendak aser chiyongtsü angati agütsütsü aser training tembangba sülen training agirtem nem kulizüng kaket tem agütsütsü.

Iba dak sendakba nung 9863217029/ 7005176609 aser www.pinnacleskills.in nungi osang tejangjaba agitettsü.

## Mokokchung nung The Teachers App sentong tenzükögo.

**Mokokchung, Rongjui/September 23 (TYO) :** Mokokchung nung tanü tesayurtem tesayuba tsütsü ajungketdaktsütsü talisa Mathematics aser Science tesayurtem asoshi The Teachers App Mokokchung Deputy Commissioner Ajit Kumar Verma IAS-i lapoka tenzüksüba sentong Sangtemla Community Hall nung agiogo.

Bharti Airtel Foundation-i küm 25 tejaklen iba sentong asoshi asameyanga tesayurtem talila temelung agütsüdaktsütsü nüngtem nung tesayuba training balala agüja arur,anungji iba App ya ajanga school tali tashi itdakja tesayurtem dang masü saka kaketshirtem aser tsüraburtem temelenshi tulu akatsü ta Mokokchung Deputy Commissioner-i ashi.

Mokokchung DC-isa sentong nung adener tesayurtem dang iba sentong ajanga tangazük agiang ta ajungshi aser district nung iba sentong takok ngua inyaktettsü asoshi administration-ia lenmang ajak nung yaritsüta lemsatep.

Kasa sentong nung Mr Hammed ajanga Bharti Airtel Foundation aser Department of School Education, Nagaland (DSEN), TheTeacherApp sentong ajanga tesayurtem



Mokokchung Deputy Commissioner Ajit Kumar Verma IAS-i Mokokchung nung The Teachers App lapoktsüba sentong nung tangokba noksa angur.

temelenshiba jemjang ka nung sayutsü talisa Mathematics aser Science tesayurtem asoshi training balala agiba aser maparen balala inyaka aruba aser inyakttsü sentongtem lemsatep.

Sentong nungsa District education Officer Smt. Sentinenla ajanga adenshia aliba tesayurtem ajungshia jembi, Diberyendu Deb Roy ajanga tepela o jembi aser Assistant Commissioner Ajay Moktan , Sr.SDEO Mokokchung, AEO, Assistant District Coordinator Samagra Shiksha , TOTs aser EBRC Personnel parnoka shilem agia adenba den sentong tesayur ajak agi 80 aden aser Smt.Alila Coordinator EBRC ketdangtsüba nung iba sentong agia liasü.

## FAC Mokokchung nung 'health talk' sentong ayongzükö



**Dimapur, Rongjui/Sept. 23 (TYO):** Ayush Health and Wellness Centre, Fazl Ali College, Mokokchung ajanga September 23, 2025 nikongdang 2:30 ako nungi tenzüka college auditorium nung 'health talk' sentong ka ayongzüka liasü.

Mezüng session nung Centre indang in-charge, Dr. Aienla M. Imchen-i World Rabies Week 2025 indang omen "Act now: you, me, community" nung ajemdaker jembia liasü.

Lai rabies indang rateta ashi

aser rabies cases shilem 90 jungnua azü ajanga lir ta ashi.

Iba tashidak ya talisa metzü ajanga menatepa aor aser virus ya tekoloki atur, ta lai ashi.

Rabies ya kanga kangshiba tashidak rongnung ka lir, ta Dr. Aienla-i ashi.

Laisa vaccine tabu balala den azü agi angoba telemsa aser angoba sülen mera agitsütem lemsatepa liasü.

Tanabuba onük ya mental health angatetba indang liasü, kong Dr. Aienla-i mental health teratet ashi aser mental health

junga aliba ajanga nisung kati tajungba bilemteter aser lokti nunga shilem tajung agiteter, ta ashi.

Pei mulungsentsü angatetba ajanga dangar mulungsentsü angatetba nunga yarir, ta lai ashi.

Lai iba sentong nung adenertem dang pei tekolok meteta alitsü ayongzükö, aser ibaji ajanga telemtetba tajung agitettsü, timtem jangjatettsü aser aseni tsüboa bilembatem tajungba nung angatettsü, ta ashi.



## Dharmendra Pradhan-i Viksit Bharat Buildathon 2025 amenoktsüogo



**New Delhi, Rongjui/ September 23 (Agencies):** Union education minister Dharmendra Pradhan-i Mongolbarnü 'Viksit Bharat Buildathon 2025' sayaogo, koba linük kübok school lakh 3 dak tema nung class 6 nungi 12 tsüngda azünger kaketshir crore 5 anisemtsü nükjidong nung amenokba innovation drive ka lir

Iba inyakyim ya Education Ministry kübok Department of School Education and Literacy (DoSEL) aser NITI Aayog's Atal Innovation Mission (AIM) na longjemer tenzükba lir, aser iba ya kaketshirtem onük pezü; vocal for local, atmanirbhar

Bharat (self-reliant India), swadeshi (Indigenous), aser samriddh Bharat (prosperous India) dak sendakba nung tebilemba balala benoktsü, aser product tem design süra prototype tem yanglutsü atema kaketshirtem ajungmesotsü atema lir. Iba ya Viksit Bharat (Developed India) den sendaktepa lir.

"Viksit Bharat buildathon yagi, onük pezü dak ajemdaker osettem apiteta yanglutsü atema kaketshirtem ajungmesoa grassroot jenjang nung innovation sobaliba akangshitsütsü. Iba inyakyim ajanga linük nung kaketshirtem sangsarsangji benjungtsü,

innovation renaissance ka engineer asütsü aser lanurtem ya samriddhi, viksit, aser atmanirbhar Bharat nonger aoer tongtimbang kaka kümdaktsütsü," ta Pradhan-i ashi.

Iba inyakyim kübok kaketshirtemi September 23 nungi October 6 nü tashi nung VBB portal (<https://vbb.mic.gov.in/>) nung züngoksemtettsü. Iba sülen school tem renemshitsü atema hopta ka (October 6 to 13) angutsü aser iba mapang tesayurtemi kaketshirtem indang idea tem asüngtetshitsütsü atema kaketshir 5 nungi 7 tsüngda achaayangtsü.

Kasa mapang nung October 13 nü ghonda ana atema live innovation sentong ka ayongzüka lir, kong kaketshirtemi parnok indang idea tem asadangshitsü aser October 31 nü tashi nung team temi parnoki yanglutetbatem benoktsü.

November 1 nungi December 31 nü tashi nung mongintemi kaketshirtemi benokbatem asadangtsü aser Buildathon ya 2026 küm January ita takoker 1000 dak tema tushiba sülen tembangtsü.

## Armed forces-i drone, counter-drone system tem tendangtsü

**New Delhi,Rongjui/ September 23 (Agencies):** October ita mezüngbuba hopta Headquarters Integrated Defence Staff-i ayongzüka exercise agiba mapang armed force temi parnok indang drone aser counter-drone system tem kar indang tashi tendangtsü, ta ketdangsür tejen kati Mongolbarnü metetdaktsü.

Iba exercise ya Madhya Pradesh kübok tesem ka nung October 6 nungi 10 tashi agitsü, ta source-i ashi.

Air defence systems dak sendakba conference ka nung o jembiba HQ IDS nung Integrated Defence Staff Deputy Chief Air Marshal

Rakesh Sinha-i, Operation Sindoor mapang angazükbatem indang jembiba, aser military dak sendakba nung tebilembangba aser tasa balala asaba ya tsükchir dang nungi tejakdang asütsü nüngdakba lemsatepa liasü.

Delhi nung ayongzüka agiba conference ya 'Counter UAVs & Air Defence Systems: The Future of Modern Warfare' omen nung ajemdaker agi, kong military ketdangsür tejentem, defence industry nung firm balala nungi lenirtem aser iba luyim nung mongintemi shilem agia liasü.

HQ IDS nungi ketdangsür tejen kati ashiba agi, iba exercise nüngja ya 'Cold Start'

ta jatsüogo.

Sentong tembangba sülen PTI den sensaksemba mapang Air Marshal Sinha-i ashiba agi, iba exercise ya Central Sector nung agitsü aser service asempronglai shilem agiba angutsü.

Industry partner tem dak alia research and development partner tem, academia aser lokti tentet balalai taruba exercise nung shilem agitsü.

"Exercise mapang onoki onok indang drone aser counter-drone system kar tendangtsü, koba air defence system aser Counter-UAS tajungba ka amenoktsü nükjidong nung agitsü lir," ta Air Marshal Sinha-i ashi.

## 2023 küm India nung gari anishir tainlonglong 2,537 asü

**New Delhi, September 23 (Agencies):** India nung tainlonglongpurtem (arrshi küm 18 ser tekübokpurtem) gari aniba nokdangtsü atema senchi teimba achiyonga mesüra tanurtemi gari anishiba atema tsüraburtem nem temerenshi agütsüyonga iba tebilemtsü ya menokdangteter, ta sorkar osang ka ajanga metetdaktsü.

Sorkar osang ajanga ashiba agi, 2023 küm gari lendong balala nung tainlonglongpur driver 2,537 süogo.

2023 küm arrshi küm 18 ser tekübokpurtem driver teimtiba asüba state ji Uttar Pradesh (573 asü) liasü; iba sülen tanabuba, tasembuba aser pezübuba jenjang nung Haryana (226), Madhya Pradesh (219) aser

Tamil Nadu (187) state tem liasü. Haryana nungbo tainlonglong gari anir tetsür 51 asü.

2023 küm India nung gari anir 78,810 asü, anungji iba nungjagi tainlonglongpur gari anirtem asübaji shilem 3 shi dang lir.

Anojungi tainlonglongpurtemi gari anishiba ajanga parnok lendongi aiba dang masü saka gari lenmang nung tangar-a lendongi idaktsübaji tsüraburtem nem angatetdaktsütsü kanga tasak, ta mongintemi metetdaktsü.

India nung 2019 küm nunga gari anishir tainlonglong 2,949 asü aser coronavirus wara ajanga gari senzüsembong tenokdangba liaka 2020 küm

nunga gari anishir tainlonglong 1,578 asü.

Wara süiadokba sülen 2021 küm gari anishir tainlonglong 1,804 asü aser 2022 küm nungbo gari anishir tainlonglong 3,446 asü.

Anojungi gari anishiba nokdangtsü atema 2019 küm sorkari Motor Vehicles Act özüng yanglushia liasü. Iba Act nung Arrla 199A bendenloka tainlonglongpurtemi gari anishira tsüraburtem khuret asütsü latet aser senchi 25,000 tashi achiba den külemi küm ka atema gari registration ji thinentsür.

Iba özüng kübok traffic özüng alema inyaker tainlonglongpurtem nem arrshi küm 25 tashi driving licence magütsütsü.

## ED-i Mauritius ketdangsürtem nem training agütsütsü

**New Delhi, Rongjui/ September 23 (Agencies):** Mauritius Financial Crime Commission (FCC) ketdangsürtem nem specialised training agütsütsü atema Enforcement Directorate (ED)-i ketdangsür pezü Port Louis-i yokogo, ta agency-i Mongolbarnü sangdong ka ajanga metetdaktsü.

September 22 nungi 26 tashi anogo pongu iba training ya agitsü, koba March ita ED-FCC nati memorandum of understanding (MoU) nung sign asüba nung shilem ka lir. Rongsenketzüng nung özüng alema inyaksangshiba inyakyimtem den raratsü asoshi linük ana tesendaktep akangshitsü asoshi iba tenangzüktepba ya yanglua liasü.

"Session tem rongnung money laundering investigations, financial intelligence, asset recovery, aser cyber-crime densema international cooperation dak

sendakba nung tongtimbang onüktem atema practical workshop tem densema lir. Sensaksem kanga junga akatsü, tajangshibatem lemsateptsü aser financial crime investigations nung inyakyim tajungtiba benoktsü atema inyakyim tem ajungkettsü asoshi session tem ayongzüka lir," ta Enforcement Directorate-i metetdaktsü.

Agency-isa, iba inyakyim ajanga Financial Action Task Force (FATF) standards aser global conventions dak sendakba nung international partnerships jenjang ajungkettsü asoshi ED-i maneni inyakba sayur, ta ashi.

Iba training sentong ya ED-FCC na longjemer inyakba nung alizüng tasen ka tongtetba asütsü, aser iba ajanga tarutsü nunga longjemer bushisüngdangtsü, technical tsütsü teyari agütsüteptsü aser intelligence lemsateptsü asoshi lenmang mesapoka toktsütsü.

## 'Tzünglu yamai aruba kodanga mongudang': Mamata Banerjee



**New Delhi, Rongjui/ September 23 (Agencies):** West Bengal chief minister Mamata Banerjee-i Mongolbarnü, Kolkata nung manger mesangwa tsüngda tzünglu aruba ama kodanga marudang ta shia nüburtem dang kilung nung dang alitsü mepeshia liasü.

Kolkata nung tzünglu kanga sashia aruba sülen Mongolbarnü inyaksangshi nung tetsükdaktsü adokogo aser nisung tenet tashi electric current agi poseta süogo. Yimti kübok tesem aika metsüngogo, transport service tem nung tetsüdaktsü adokba den gari senzüsenpong mejungi aküm.

"Tzünglu yamai aruba ni kodanga mongudang. Lendong nung asürtem atema kanga sasasete bilemer. Temulung magütsüi toktsüba wire ka agi nisung 7-8 puseta asü ta ni angashio. Iba ya kanga dang tia maka tatalokba ka lir," ta Mamata Banerjee-i ashi.

Laisa, lendong nung asür kinungertem nem power utility CESC-i mapa agütsütsüla ta ashi. "Ni iba ya jangja jangja ashir, onokia takokba tashi teyari agütsütsü atema inyaktsü," ta

chief minister-i ashi.

Kolkata nung manger mesangwa tsüngda ghonda tenet shi tzünglu aru aser iba ajanga tesem aika tzü agi metsünga gari, train aser metro senzüsenpong nung tetsükdaktsü adoka liasü. Tzünglu kanga sashia aruba ajanga ketdangsürtemi yimti nung school kar shibangja liasü. India Meteorological Department (IMD)-i ashiba agi, Purba aser Paschim Medinipur, South 24 Parganas, Jhargram, aser Bankura district tem densema south Bengal nung Bodhbarnü tashi tzünglu kanga sashia arutsü imlar.

Tzünglu ya Kolkata kübok Garia Kamdahari, Jodhpur Park, Kalighat, Topsia, Ballygunge aser Thantania nunger nung kanga sashia arua liasü.

Maneni Mongolbarnü tsüngsang majungba ajanga Kolkata kübok Netaji Subhas Chandra Bose International Airport nunga inyaksangshi nung tetsükdaktsü adoka liasü. Kolkata Airport ketdangsürtemi ashiba agi, taoba ghonda 42 tsüngda tayimtsü 30 shi thitsüogo.





## TIR YIMYIM YIMOBILEM (EDITRIAL)

DIMAPUR WEDNSDAY, SEPTEMBER (RONGJUI) 24, 2025

### Kibur maliba yimti !

**N**agaland nung yimti tulutibaji Dimapur asütsü aser Naga nunger ajak atema tajung kaji, Dimapur yabo ozü kin aser par kin meyong, ozü tama nür tesü, onok teimba enok eshinba ta asüba kecha mali, ibai arok yimti lir. Iba yimti nungbo Naga nungertem dang masü saka tzümartem dena kibur kümer alir. Ibayongji, yimti nung lenmang tenünga Anwar Hussain Road ta, Gurmukh Singh Road (GS Road) ta tamalen Dimapur nung yimten aser lokti lenirtem tenüng nüngosa jateta yutsüba angutsü. Itemji rasaa meshiaka, Dimapur yabo ajak meyong, anungji senso tajungbo ajak tarendak kecha makai sademsadema alitsü akokba yimti ka lir ta angateter. Aji oda, iba yimti nung tamangba yimsü tsütsü kati ka anemtepa timtem lendong atalokba otsü mali, anungji alima nung pei külemnüba tsüngrem sadoksadoka külemtetba limaji Dimapur ya ka asütsü. Itemji Dimapur yimti dak aketba tashi (strength) aser topur ajung lir. Ajisüaka, tebilemdangtsü aser teinyaktsü kaji, item tashi aser topur ajungji agiteta meyushia amshitetsüsa Dimapur nung kiburtem rongnung Dimapur meima anepaluba kiburbo kata mali amato, Dimapur agi Dimapur purtem nümamedangtetsüsa kümogo. Aji oda, yashi yakanü Dimapur District Planning and Development Board senden nung Dimapur yimti nung motzüa dena sadema moutetsüsa Dimapur nung alir ali kiburtemi ali atsünga agiba aser train station aser airport dena ulushia mekümtetsüsa ali mesademi akümba tebilemtsütemang jembitsüsa akümba jagi, Dimapur tejakleni aoer masü saka tesülen atsüngzükbä meteter. Itemji dang masü saka Dimapur nungbo District Sports Council- a mali ama, tejenba public ground-a anepalu mesüteter aser tasenba stadium-a merenemteter ta Dimapur yimti nungbo saisapong tsütsüa tejangrar mali amato yimtok küma odagi. Item ajakji kiburi temulung magütsüba ajanga lir. Dimapur nung alirtemi angatetsüba kaji, Dimapur nung kiburji Kohima nung aliba governor aser chief minister-ji masü saka Dimapur nung alirtemji lir, anungji governor-ba o Chief minister-ba nati Dimapur memeimyonga Dimapur nung alirtemibo Dimapur meimtsüla, kechiyong tang ama Dimapur tzümetsüng nung Kohima nung alirtemji kangshitsü masü, Dimapur nung alirtem kangshir, kasaji Dimapur nung aliba mozü kitem aser kaketrejutem majung nung Kohima nung alirtem akoksatsü masü, Dimapur nung alirtemsa akoksatsü. Aji oda, Dimapur yimti teshinem menema ayu nung, Kohima nung alirtem menemtsü masü saka Dimapur nung alirtemsa menemtsü aser Dimapur yimti yimdong lishi aser auyi agi sünga ayu nung, Kohima nung alirtem dang nungibo Dimapur nung alirtemsa timtem aser maksü tajuruba ajurutsü. Ajisüaka, Dimapur ya kibur maliba ama küma ao nungji, shibai government li rakzüka pei meyong li kümtetdir, pai moa ta ser toktsür. Aji oda, kibur maliba lima asünungji, yimti yimdong nung janaonaa mashi nung endoker, ayong nokdang ki yanglur, lenmang lendi atsünga ki yanglutetra paji takar aser tulur ta naroküm tajung ka angu amai bilemer. Joko, lia lia yimti yimdong nunga meshimetsürtem mesemi kümogo. Aji oda, külen motzü, külen lishi, külen auyi aser külen meshimetsürtem ta Dimapur agi Dimapur pur nümamedangtetsüsa menendaktsüdag. Item ya Dimapur nung kiburtemi repringtetsüla. Atangji, ajak kibur saka kiburtem madaka kiburtemji Dimapur nungi adokba MLA-temi anir District Administration, Dimapur Municipal Council, Naga Council Dimapur aser Dimapur Naga Students' Union purtem asütsü. Item kiburtemi tang Dimapur nung ajuruba timtem aser tebilemtsü madak kibur kümer, item khuretemji bena Dimapur yanglushi tenzü nungbo, küm ka tsüngda Dimapur ya tangar yimti ama sentsüpranga akümtsü. Tanü putu nung pi yimtitem nungbo azüklen apu, flyover, aser ropeway yanglutsü jembidang asenok yimti nungbo kilentzüi motzü junga maiba tebilemtsü indang jembitsüsa akümba tensa mapang ya asenok ajak asoshi temulung ashitsüka lir. Ajisüaka, temenu mali, kechiyong item tebilemtsütem ya Dimapur nung kiburtemi kibur küma khuret aben nungbo melamelaa koktetsü.

## OLEMSABANG

### SALAM Aser SALEM

#### Iba ojang ana indang Tesendaktep Ratettsür

- Rev. S. Temjen Longkumer, Chümoukedima.

Tir Yimyim August 23, 2025, Olemsabang nung asen lenir aser tesayur P. Renthly Jamir-i züluba ocet "Sobaliba, jayajako aser Salem ratet". Iba ocet nung tezüluri SALAM nungi SALEM ta melenä jembiba aser züluba idaki kü tangatetba kar asenok den lemsateper.

Tang adianu P. Renthly Jamir-i ashi ama, Salam ya Ao O masü. Saka bendanger tzümar oashi nungi lir. Bendanger oshi apua amshiba. Kechiaser iba kasa tetezü nung jembitsü Ao O tapet mungutet mesüra bena marutet. Anungji tensa tia agi iba ojang ya amshitsüsa aküm ta angateter. Kün 100 tejaklen Foreign missionary tem aliba mapang aser ano tzümar den metettepba akümdang par oshi ji par olasüym nung jembitsü aser zülutsü tim asü nungji yamaji Salam ta jembia zülü.

Saka küm 100 dak tema mesüra tali iba o ya jembia arudang joko iba ojang Salam ya Ao O kümadok (Transliterated süadok). Yamaji küm tem süia aodang asenoki jembiba Ao oshi olasü tera, tera melenshia akümba asenoki meteta arur. Anungji temalen Ü amshiba aika tangbo E agi melenogo. Tatishitsü, nisungtüm nungi nisungtem, kaküttüm nungi kakettem, ano aika lir. Yamaji Salam nungi Salem ta jembiba aser züluba angur (a melen e) Aser ibai asenoki asen oshi olasüym nung jembidang asenoki asen sasa memeteti melenshiba lir aser züludanga kasaji zülutetsüsa aküm. Tanübo Ao oshi jembir ajaki ta ashitsü akok, jembidang aser züludang Salem ta amshiba meteter. Aji agi Arok Osep nunga Salem ta zülua lir.

Iba ojang (Salam) ya tetenzük nungi (originally) Ao O mesüka küm 100 dak tema amshia aser jembia arudang asen sasa Ao O kümdaktsüogo. Aji shingaia nunga ta meshitetsü. Tatishitsü, English oshi ya tongtibang ojang timbaka Greek aser Latin oshitem nungi apua amshiba lir. Aji English standard Dictionary (Osep) nung kuli tejangja sayua lir.

Anungji ibai joko asen O kümadoker asü nung asen oshi olasüym nung jembiba aser züluba nungji teratatsü mesüra tebilemtsü (problem) kecha malitsü südi ta bilemer.

### LAI BUSHIBA: ALIMA NUNG TASHI TULUTIBAJI TAMANG (IBRI 11: 1-40)

~ Rev. Maong Lemtur

(Iba ya DABA Tongtepratep Adok 156, January - July 2024 nung adokba ocet tazüngertem ajangzükdaktsütsü bilema adoktsür).

(Yashi adok nungi...)

"Tamang agi anogo tenet Yeriko lung jara meket nung aji lao. Tamang agi Rahab nüktapangtalai idangitertem pela-a agizük nung tashi mangartem den la mesama" (t. 30-31).

Yihusua mapang nung Isreal chirtemi tamang agi Yeruko yimti jara laodaktsü. Tamang agi Rahab nüktapangtala mamangertem den tesama tia majuru. Item ajak ya tamang ajanga takok anguba tatishitsü tulu lir. Yamaji shiri tamang agi inyaker parnoki takok tajung angur. Tamang nungji takokba lir ta iba yagi sayur. Ne mapa nung takok angutsüsa ne dak tamanga ali asüng mali? 7. Tamang nokinketeter tatishitsü (Ibri 11: 32- 40).

Tejen Lai nung Tamang nokinketeter Gideon, Barak, Samson, Yefta, Dawid, Samuel aser ainkartem liasü. Tamang agi parnoki yimlitem akok, molusongzü tebang nembangtsü. Tamang agi Mi tashi remsep, nokpu nungi jenbu aser bendanger temerangertem akok. Tangari tataala nung lisü agi arepba, tsüngden chiokba tatitang angu, lung agi onset, süngrangtsü agi rangma, nok agi tepset. Item timtem tekangshi ajakji tamang ajanga parnoki kokteta ao.

Anungji parnok tamang nokinketer rongnung züngsem. Item tatishitsü tsüngsü nung tanü tamangertem jajar. Timtem, tejashi aser tatidang koktetsüsa ne tamanga lir ma? Khristan taküm alima tongbang raratsü asoshi nüngdakba tulutibaji tamang lir. Tamang medeni temenen tongbangji raratsü makok. Ibri tapu 11 nung kechi tatishitsütem asenok nem agütsü iba nungi asen tatishitsü agira takokbaji asen meyong asütsü. Tsüngremi Pa O shisadanger ajak moajang!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



# Myanmar bishop-i Rakhine state nung asürtem mang ayim



**Sittwe, Rongjui/Sept. 23 (Agencies):** Myanmar kübok Rakhine state nungi Catholic bishop kati mitkar aser parnok anemer tsüngta raraba ajanga nisung asüba aser pei ki yutsür tesem balalai arishiba, yasa-tzüraba aser tashiyim agi sepai nung shimba ajanga nüburtem timtemba atema tejashi lemsatepa liasü.

"Rara aliba sepai telok ana tsüngta tai maket civilian tem mejeper," ta Pyay diocese nungi Bishop Peter Tin Wai-i ashi.

Mitkar temi ethnic armed group Arakan Army (AA) tashi ita aliba tesemtem nung timba tayimtsü amshia amaker, shirnoki Myanmar anüolen Rakhine state nung municipalities 17 aliba nungi 14 densema tesem timba amokbanga lir.

"Sepai telok anaprongi tashiyim amshia lanurtem anioka raradaksür. Iba yongji lanurtem ajunga bendang limai jena aor aser lokti nung tashi tajungba samar," ta Wai-i ashi.

Kanga sashia raraba nung tesem aika samadokba sülen mitkar anemer kübok aliba tesemtem nung tayimtsü nungi bomb pokloktsür.

Kyauktaw jila nung September 12 nü school ana dak tenük yoker tayimtsü amshia amakba mapang nisung 20 asü, ta osang ajanga ashir.

UN Children's Fund (UNICEF) densema nisung temeden asoshi nokdakba tentet balalai September 12 nü amakba sülen tebilemtsü khuret lemsateper aser ibai Rakhine state nung azüdokshi yimya tali tamajungba akumba nung bendenlokba lir, kong tanur aser kibongtemi timtem tali agir ta ashir.

2021 küm mitkar tashi amshia sorkari atsüngdokba sülen civil war tenzüker Rakhine state nung raraba nung nisung noklang aika tepsetogo ta ashir.

Rakhine state anüdok tsütsü arütsülen tanen makai kanga sashia rarar, kong mitkar anemba telok tem tashi

tuluba lir. "State tesem tuluba Arakan Army temi agia lir. Item tesemtem nung osangtsüsang agitepba rakdangogo, education system nung timtem lir aser nüburtem takum alitsü meranger," ta Wai-i ashi.

Pyay dioces nungya iba territory nung parishes 12 lir aser yangji Catholic nunger 30,000 shi lir, saka tesadang ka Arakan Army kübok aliba tesemtem nung alir. Tanüngba tamangertem ya state yimtiba Sittwe, Kyaukpyu aser Munaung municipalities densema mitkar kübok aliba tesemtem nung alir.

Putirtem tim atemer, anogoshia pei mapa inyaka pei

akaba rongsen agi peritsü meranger, parnoki sentong balala ayongzüka tekülem ki tem lapoka alitsü meranger," ta Wai-i ashi.

Iba rara ya ajanga kin aika tesem balala nung prokshia lir.

Taküm iba rara mechi Rakhine nungi Rohingya Muslim 150,000 dak tema Bangladesh-i jena ogo, ta United Nations ajanga ashir. Yangji Rohingya nunger 750,000 dak tema 2017 küm mitkar temi azüdokshiba mechi Rakhine nungi jena oa lir.

"Refugee tem Pyay-i arur mesüra state yutsür Yangon-i pei takum kumzüksü mechi jena aor. Chiyongtsü, education aser healthcare facilities maliba ajanga Rakhine nung alirtem timtemer," ta Wai-i ashi.

"School ama nüngdakba services aliba tesem temi kibong ajunga aotsü meranger," ta pai ashi.

Myanmar tesem balala nung nisung 3.5 million dak tema pei ki yutsür jenshia lira ser Rakhine state kisüng nunga yamaji nisung 500,000 dak tema lir, ta UN data ajanga ashir.

Putirtem aser arogo tem nüburtem anasa lia item timtem agi kongshir alir mulungjang nung anisüngzüc agütsütsü meranger, ta Bishop Wai-i ashi.

## ANOGO ABEN TSÜNGREM DEN

### Pa den jajaba taküm


*"Nenoki kechi koda Kibuba Khrista Yisu agizük, .... yamaji Pa dak jajaang."*

*Kolosi 2:6-7*

Tamang agi jajabaji tashi angaa jajaba lir. Mezüngbuba meraji kodang asenoki pei sasa angateta Khristaji Lenmang, Ochi, aser Taküm ta agizüker idangji tenzüker. Lenmang piyong asenok den alitsü asoshi tasü nungi shia aruba Khrista arua asenok dak alir. Tanela Temeshi ajanga pa asenok den adener. Israel nunger Kanani aotsü asoshi mezüngbuba mera süia aoba benjung aonung San chanu zü nung tenzüc. Saka parnoki Tsüngremi parnok Ijip nungi anitettsü akok ta amang. Saka pai Kanani anir aitsü tabo mamang. Koda tejashitsü! Parnok "mamanger" tamanger telok liasü. Parnoki mezüng tamang mera ishika ao, saka linük kishizüng nung masü ta ashi.

Parnok kisüng masü liasü. Parnoki tatidangba ajuru. Asenoki tanguba agi masü tamang agi jajatsula. Aji saka asenoki tanguba agi jajar. Shitakba jajabaji tamang aser tamang kisüng. Asenoki jilia tatembangji metetner. Iba tebilemba jagi asenoka Israel nunger mamanger tamangertem rong nungji dendaktsür. Iba yongji asen Kibubai ashir, "Ni nenok anebalutsü. Kü den jajang." Tamang agi tenzüker, tamang agi asenok Khristan kaka ama alitsüla. Asenoki Pa den jajadang Pai mera shiaji sangwatsütsü.

# Nübur yaritsü atema rongsen amshiang: Pope Leo XIV



**Vatican City, Rongjui/Sept. 23 (Agencies):** Linük balala lenirtemi rongsen agi nok-nü kumdakja nisung meimchir samatsüba nung amshitsü melenamapa tajung asoshi amshitsü atema Pope Leo XIV-i sarasademtsü.

"Shibai Tsüngrem tenzüker, pa rongsen talenba nungi salar, saka shibai rongsen tezüker, pa iba indang alar dang alir," ta Pope-i September 21 nü Vatican nung aliba Church of St. Anne nung ashi.

"Shibai ochi bushir, pai rongsen ya arok ajungtsü asoshi amshir, aser shibai amokbangtsü meranger, pai arok ajungtsü mapa tem pei morumoru asoshi sang ama kumdaktsür," ta pai ashi.

Vatican City State telung nung aliba tekülem ki tilaka nung anepdang sentong agidang aser anüngdang teroto mapang St. Peter's Square nungi temeshi ainlen jajar aser tesemdanger meyrirjang aika den jembidang

Pope Leo-i Catholic nunger dang sen aser ali rongsen den tesendaktep aliba asadangtsü ayongzüka liasü.

Paisa Catholic nunger lokti tentet balalai Gaza nung humanitarian aid agütsütsü asoshi sen bendenba aser yimjung asoshi sarasadem sentong agiba atema pelaba lemsatepa liasü.

"Temang shi aser mulungsentsü timtema aliba asen adianu aser adianutsür den yaritepa nenok aser arogo balalai mapa tajung jenti inyakba atema pela agizüker. Nenok aser Holy Land nung aliba arogotem indang pastor tem den külemi ni ya nenshia ashir: Azüdokshi, tashiyim agi bendang limai yokba mesüra mangyangba nung tarutsü jenjang kecha maka. Nüburtemi yimjung nüngdaker, shirnoki ochiba nung parnok meimer, parnoki yimjung asoshi inyaker," ta Pope Leo-i ashi.

St. Peter's Square nung nisung telok kati sentsü balala aliba banner ka nung Italian oshi nung "Gaza asoshi tesunep" ta zülua bener liasü. Pope-i azüdokshi anentsü ayongzüka nüburtemi teka

ma pela agizük. Church of St. Anne nung sentong agidang, "Tanü nisung ajunga azüdokshi ajanga ajemzüka yoka lir. Item lendong timtem nung asenoki jenzüka aotsü memulunger, saka Yisu jidang alima kumzüker aser pai temenen ajunga nungi asenok kumzüker ta sangdongtsü," ta ashi.

Tanüla Temeshi agi temulung meyipdaktsütsü asoshi Pope Leo-i sarasadem. Yisu-i otsü ashiba ajanga asenok dang alima rongsen aser Tsüngremi asen nem agütsüba takum koma ketdang asür ta asüngdang, ta pope-i ashi.

"Asenoki pei atema kisüng bilemba lenmang nung jajaa asen atema kisüng bilema ajak dang rongsen taoba ta litettsü. Saka iba yagi asenok dangar nungi pilar aser toktepba miim prokshidaktsür, koba ajanga aiben rongrong tenzüker," ta pai ashi.

"Asen ket nung aliba ajunga Tsüngrem nungi sempet agütsüba ama agizüka lemsatepba, tesendaktep yangerba, aria bilemba, arok ajungtsü asoshi inyakba nung amshitsü akok," ta paisa ashi.



**AO OSHI ANGAZÜKDAK:****TANÜ ANGAZÜKTSÜBA OJANG****Tezülen**

(n) tiyong nung masü tiplen ( at side, not in the middle)

\* Lenmang tezülen mejajatsüla.

**Tezüng**

(n) temang nung adokba ku ( body hair)

\* Nisung tain akümdang temang nung tezüng adoker.



Tir Yimyim

**OLONG PAITEP # 7280**

|    |  |    |  |    |  |    |   |    |  |   |
|----|--|----|--|----|--|----|---|----|--|---|
| 1  |  |    |  | 2  |  |    |   | 3  |  | 4 |
| 5  |  | 6  |  |    |  |    |   |    |  |   |
|    |  |    |  |    |  |    | 7 |    |  |   |
| 8  |  |    |  |    |  |    |   |    |  |   |
|    |  |    |  |    |  |    |   |    |  | 9 |
|    |  | 10 |  |    |  | 11 |   |    |  |   |
|    |  |    |  |    |  |    |   |    |  |   |
|    |  |    |  | 12 |  |    |   | 13 |  |   |
| 14 |  |    |  |    |  |    |   |    |  |   |
|    |  |    |  |    |  | 15 |   |    |  |   |
| 16 |  |    |  |    |  |    |   |    |  |   |

**TIPLÉN**

2. Auonungchiyongsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

**LANGTSÜNGLEN**

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A \_ \_ \_ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S \_ \_ \_ k

-(3)

14. T \_ \_ \_ r

-(3)

**OLONG PAITEP # 7279 TELANGZÜBA****TIPLÉN:**

1. Tesangra, 5. Mungo, 7. Kisen,

8. Salem, 12. Semki, 14. Kilem,

15. Kensü, 16. Sangpang.

**LANGTSÜNGLEN:**

1. Temesen, 2. Raksa, 3. Aon,

4. Aso, 6. Nile, 9. Alizüng,

10. Omen, 11. Lemta, 13. Ola,

14. Kin.

**NAI-A YA METETTER****Congratulations****Rose Angeline M Kharsyntiew**

Meghalaya nung rural service provider Kong Rose Angeline Kharsyntiew nem World Record of Excellence Award agütsüogo. National Integrated Forum of Artists and Activists (NIFAA)-i September 23, 2025 nü New Delhi nung ayongzüka agiba sentong nung motivational speaker aser author Shiv Khera-i la nem sempet agütsü.

**Asür Zubeen Garg nem 'full state honours' agütsüogo**

**Guwahati, September 23, 2025 (Agencies):** Nüngtugu Assamese kentener Zubeen Garg Mongulbarnü Guwahati anasa Kamarkuchi, Sonapur nung full state honours agüja rongdokogo.

Asür Zubeen ya Singapore nung September 19 nü asü aser tanü pa den asüpila sentong nung nisung meyrjang aika aden.

Public-i tetushi agütsütsü atema Zubeen indang mang ya Deobar nungi Arjun Bhogeswar Baruah Sports Complex nung ayu aser tanü naro agi sobuba ambulance ka nung enoker

cremation site-i bener ao.

Zubeen tenu tanutsüla Palmi Borthakur den par medemer Arun Garg aser Rahul Gautam Sarma nungeri mi senoktsü. Assam Police personnel-ia 21-gun salute agüja tushi.

Assam Chief Minister Himanta Biswa Sarma den Union Minister tem-Kiren Rijiju aser Sarbananda Sonowal, Assam Assembly Speaker Biswajit Daimary nunger den tongti lennir aika iba sentong nung aden.

Zubeen aser pa kinungtsü Garrima Saikia Garg na tanur agi sosema mali aser iba jagi pa

tenui asüpila sentong nung teinyaktsütem inyak.

Zubeen tanur asüadang aliba Jorhat nung alirtemi Deobarnü national highway mokdang pa den asüpila sentong Jorhat nung agitsü takhangba agüja liasü.

Zubeen den küm 30 tema medema arur Union Minister of State Pabitra Margherita-i tang tashi pai Zubeen asüba magizükteter ta ashi.

Zubeen Garg ya taoba Hokolbarnü Singapore nung tzi nung arkaset. Pa ya North East India Festival nung shilem agitsün atema Singapore-i aoba liasü.

**Manipur nung CoTU-i AH-1 mokdangtsü aliba athi**

**Imphal, September 23, 2025 (Agencies):** Committee on Tribal Unity (CoTU)-i September 22 ayaterm nungi Asian Highway-1 (AH1/NH-2) mokdangtsü sentong aliba thinenogo.

September 19 nü Nambol, Bishnupur district nung 33 Assam Rifles amakba anema CoTU-i anogo asemnü 'economic blockade' alitsü

lemtet. Iba lendong ya security maparen nung metokmeperi ajanga atalok aser mapa inyaktsüla ta parnoki ashir.

"CoTU-i ashiba onüktem atema bangdakpurtemi mapa inyaktsü ta nangzüka agi onoki lungkak aitba thinena atatsü lemtet" ta Chairman Lunthang Haokip-i ashi.

Civil society organizations-

i mepishiba aser AH1/NH-2 nung anentsüh aluba onüktem nung ajemdaker Hombarnü CoTU executive meeting nung mokdang thinena atatsü lemtet ta Haokip-isa ashi.

CoTU-isa public dang parnoki yariba atema pelaba metetdaksü aser sorkari tarutsü nung ibala lendong mataloktsü atema teinyaktsü mapatem inyaktsü ayongzü.

**Toyota Kirloskar Motor-i Rumion gari nung airbags 6 enoker**

**Bangalore, September 23, 2025 (Agencies):** Toyota Kirloskar Motor (TKM)-i safety philosophy aser customer-first approach tangatetba nung Toyota Rumion gari tajungba yanglushiba osang metetdaksüogo.

TKM-i passenger safety atema bilema Rumion variant shia nung airbags 6 (front, side, & curtain shield) nung enokogo.

Rumion gari ajak nung dual front airbags, 2 side airbags, aser 2 curtain shield airbags dena comprehensive 360-degree safety agütsür.

Toyota-isa V grade nung Tyre Pressure Monitoring System (TPMS) enoker aser iba ajanga tyre pressure teti repranger, totzü tajemba atsüktsü aser gari nung sadema amentsü.

Toyota Rumion nung 7-seater layout lir aser iba den premium chrome grille, projector headlamps, LED tail

lamps, aser dual-tone machined alloy wheels aliba ajanga tanü asüng kibongtem asoshi gari asütsü.

Rumion nung Toyota i-Connect lir aser iba ajanga s m a r t w a t c h compatibility, voice assistant support, remote lock/unlock, climate control, aser safety alerts agütsür. Maneni wireless Android Auto aser Apple CarPlay lir, steering-mounted controls, aser premium Arkamys Surround Sense\* audio enoka lir.

Rumion gari nung 1.5L K-Series engine den NeoDrive (Petrol) aser E-CNG options lir. Petrol gari ajanga 20.51 km/l (MT) aser CNG ajanga 26.11 km/kg mileage agütsür.

Toyota Rumion ya 3-year/ 100,000 km warranty (extendable up to 5 years/



220,000 km) den Toyota indang Express Maintenance aser 24x7 roadside assistance angütsü.

Toyota Rumion ya Rs. 10.44 lakhs (ex-showroom) nungi tenzüker aser na anasa aliba Toyota dealership mesüra www.toyotabharat.com nung online ajanga book asütsü akok.



GOVERNMENT OF NAGALAND

DIRECTORATE OF EMPLOYMENT,SKILL DEVELOPMENT&ENTREPRENEURSHIP

NAGALAND: KOHIMA

GOVT. I.T.I TRADE TEST RESULT

Dated Kohima, the 23rd September 2025

NO.DET-7/20/2001 (Vol-VII):/1170

The result of the 102nd Govt. Industrial Training Institute, Trade Test under SCVT held in the month of August 2025 at Government Industrial Training Institutes - Kohima, Chümoukedima, Mokokchung, Mon, Phek, Tuensang, Wokha & Zunheboto is hereby declared and the Roll Numbers of successful Candidates are given below :-

| Govt. ITI       | Pattern                               | SCVT | Roll Numbers                                                                                                                                                                                                        |
|-----------------|---------------------------------------|------|---------------------------------------------------------------------------------------------------------------------------------------------------------------------------------------------------------------------|
| 1. Kohima       | Annual (1 year)                       | SCVT | <b>Km</b> - 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 36, 37, 38, 39, 40, 41, 42, 43, 44, 45, 46, 47, 48, 49, 50, 51, 53. |
|                 | Annual (1 year) Repeater              |      | <b>Km</b> - 107R1                                                                                                                                                                                                   |
|                 | Annual (1 <sup>st</sup> Year) Private |      | <b>Km</b> - 02P                                                                                                                                                                                                     |
|                 | Annual (1 <sup>st</sup> year)         |      | <b>Km</b> - 34                                                                                                                                                                                                      |
| 2. Chümoukedima | Annual (1year)                        | SCVT | <b>Ch</b> - 01, 02, 03, 04, 05, 06, 07, 08, 09, 10, 11, 13, 14, 15, 16, 18, 19, 20, 21, 22, 23                                                                                                                      |
| 3. Mokokchung   | Annual (1year)                        | SCVT | <b>Mk</b> - 01, 02, 03, 04, 05, 06, 07, 08, 09, 10                                                                                                                                                                  |
|                 | Annual (1 <sup>st</sup> year)         |      | <b>Mk</b> - 12, 13, 14, 15                                                                                                                                                                                          |
|                 | Annual (2 <sup>nd</sup> year)         |      | <b>Mk</b> - 16,17,19, 20, 21, 23, 24, 25, 26, 27, 28, 29, 31, 32, 33, 34, 35, 36.                                                                                                                                   |
|                 | Annual (1 <sup>st</sup> Year) Private |      | <b>Mk</b> - 01P                                                                                                                                                                                                     |
|                 | Annual (2 <sup>nd</sup> Year) Private |      | <b>Mk</b> - 01P                                                                                                                                                                                                     |
| 4. Mon          | Annual (1year)                        | SCVT | <b>Mn</b> - 01, 02, 03, 04, 05, 06, 07, 08, 09, 10                                                                                                                                                                  |
|                 | Annual (1year) Repeater               |      | <b>Mn</b> - 09R1                                                                                                                                                                                                    |
|                 | Annual (2 <sup>nd</sup> Year)         |      | <b>Mn</b> - 53, 54, 55, 56, 57, 58, 59, 60, 61, 62, 63, 64.                                                                                                                                                         |
| 5. Phek         | Annual (1 year)                       | SCVT | <b>Pk</b> - 01, 02, 03, 04, 05, 06, 07, 08, 09                                                                                                                                                                      |
| 6. Tuensang     | Annual (1 year)                       | SCVT | <b>Ts</b> - 01, 02, 03, 04, 05, 06, 07, 08, 09, 10, 11, 12, 14, 16, 17, 18, 19, 20, 21, 22, 23.                                                                                                                     |
| 7. Wokha        | Annual (1 year)                       | SCVT | <b>Wk</b> - 01, 02, 03, 04, 05                                                                                                                                                                                      |
| 8. Zunheboto    | Annual (1 year)                       | SCVT | <b>Zn</b> - 01, 02, 03, 04, 05, 06, 07, 08, 09, 13, 14, 16, 17                                                                                                                                                      |
|                 | Annual (1 <sup>st</sup> year)         |      | <b>Zn</b> - 10, 11, 12, 15.                                                                                                                                                                                         |

Note:

1. Trade Certificate / Marksheet will be issued to successful candidates during Convocation Programmei.e, on 2nd October 2025 (Thursday).

2. For detail information candidates may contact their respective Head of Institute (Govt. Industrial Training Institute).

Sd/-

SAVIO VISA, Director

## Mali, Burkina Faso & Niger linüktemi ICC toktsüogo



**Dajar, Rongjui/September 23 (Agencies):** Africa anüolen military-i yimsü asüba linük; Mali, Burkina Faso aser Niger nungeri International Criminal Court toktsüba sangdongogo. ICC ya "neocolonial repression" atema hadir ka ta shia parnoki iba lokti tentet ya toktsüogo.

Hombarnü külem sangdong ka ajanga linük asem yagi iba osang metetdaksüogo, aser iba ajanga Africa anüolen Sahel region nung maneni yimden yimsüsüba tsütsü temelenshi adokba sayur, kong 2022 nungi 23 küm tsüngda military-i sorkar tiben atsünga liasü.

Military ketdangsürtemi yimsü asüba iba linük asem ya West African regional bloc ECOWAS nungia atsüngina Alliance of Sahel States ta nüngja agütsür lokti tentet tasen ka tentetogo. Maneni parnoki anüolen aliba linüktem den defence dak sendakba nung tesendaktepba aliba nungi atsüninogo aser Russia den tesendaktep yanglushidar.

Mali, Burkina Faso aser Niger nunger ya küm metsü dak tema ICC indang züngsem süa aruogo. Ajisüaka parnoki ashiba agi, iba okadak yagi, rara nung aibelen menaba, meimchir temeden anema

inyaksangshiba, tangar amakba aser kin samatsütsü merangba ken o dak sendakba nung obendang magütsüteter.

Linük asem ya tang Islamist militant teloktem den raraba mapang lir, shirnoki alinük aika atsünger lir aser taküma military installation tem aiben makogo.

Human Rights Watch aser tanga teloktemi Burkina Faso aser Mali na nung ozüng alema inyaksangshiba atema telungpurtem aser military naprongla aitsüogo.

April ita United Nations expert temi ashiba agi, Mali nung sepaitemi civilain ishika tepsetba ya rara nung aibelen den kasa asütsü.

Rara mapang aser talisa telungpurtemi azüoker aliba Gao, Timbuktu aser Kidal tesem nung aibelenba dak sendakba nung ICC-i 2013 küm nungi Mali nung bushisüngdanga arudar. Taküm küm tetenzüklen France-i teyari agüja telungpurtem ya nongshiogo.



Manila, Sept. 23: Philippines nung Ilocos Sur Province kübok ayong ka ajanga Philippines Coast Guard kati nisung ka kumzükba noksa nung angur. Hombarnü Ragasa yipru agi Philippines north tsütsü kongshia tzünglu kanga sashia aruba den mopung adenba ajanga tesem aika nung tzümetsüng adoka süngdong-lidong aika laodaktsü aser kilem shisaa nisung ka asü aser kar yiru.

## Ukraine-i Bryansk, Samara nung Russia indang oil infrastructure amak

**Kyiv, Rongjui/September 23 (Agencies):** Ukraine military-i manger mesangwa tsüngda Bryansk aser Samara na nung Russia indang oil distribution facility ana makogo, ta Kyiv indang general staff-i Mongolbarnü metetdaksü.

Samara nung military-i line production station ka amak, kong tanga linüki yoktsü atema Russia indang flagship Urals oil grade atema Russia indang totzü meyokteper, ta general staff ya Telegram ajanga metetdaksü.

Bryansk nung Ukraine-i pipeline production station ka amak, koba Russia indang army nem supply agütsütsü atema kanga tongtimbang lir, ta kasa sangdong ajangasa metetdaksü.

"Tesem ana amakba sülen teraksatsüba asadangdar," ta general staff-isa shisem.

Ukraine-i tawa asendenshir drone tem amshia Russia indang oil production sites tem maka arudar. Russia-i totzü yoka rongsen aazükba aser raraba tesemi totzü yokba tajemba kümdaktsütsü

nükjidong nung Ukraine-i tongtimbang facility tem maka arudar.

Russia indang defence ministry-i Telegram ajanga ashiba agi, parnoki Bryansk aser Samara nung Ukraine nunger indang drone tem raksatsüogo. Ajisüaka ken o dak sendakba nung Russia-i yimjak nung kecha osang agüja mali.

Kyiv-isa, Russia-i atsünger aliba Crimea tesem nung military airfield ka makogo, ta Ukraine indang general staff-i ashiba den tayimtsü ana dak kongshiogo, ta shisem.

2022 küm February ita nungi tenzüka Russia nunger sepaitemi Ukraine yimtiba densema tesem balala maka arudar. US-i anir linük balalai iba rara tembangdaksütsü atema jembishinüa arudar, saka tang tashi yimjung meyangluteti lir.

Kasa mapang nung Russia nongshitsü atema US-i anir linüktemi tenokdangba balala agütsüogo, saka iba ajanga tajangzük monguteti arudar.

## Palestinian statehood ajanga Gaza rara tembangtsü: UN



**New York, Rongjui/Sept. 23 (Agencies):** Hombarnü United Nations General Assembly Tir Annalena Baerbock-i occupied West Bank nung Israel nunger alitsü tesem ulushiba aitsü aser two-state solution ya tongtipang lir ta nenshia ashi. Kasa mapang Palestine nunger linük agizükba linük tesüsabaji Monaco kumogo.

Linük 145 dak temai Palestine linük ka ali junger ta agizükba nung tesüsa adenba linükji Monaco ya alitsü.

Occupied West Bank nung 'settlement expansions' aser ki o jen raksatsüba yagi yimtenren tsütsü tangatettep kati arutsü teimla samatsür, ta Baerbock-i ashi.

Israel-i West Bank nung housing units tasen yanglutsü sentong agizükogo, koba ajanga iba territory ya ana kuma sadangtsü.

Taoba mapang Israel Finance Minister Bezalel Smotrich-i "Palestinian state ya langpang nungi yimyim agi masü saka mapa agi aidoktsüogo," ta shia liasü.

UNGA tiri Gaza nung ki o jen raksatsüba nung kinunger

rema aliba Palestine nunger aser Hamas-i pua aliba chioktsü ataa aliba kinungertem den sensaksemba bilemteta jembi.

"Israel nunger tetsü kati küdang yamai ashi, Gaza nung Palestine nunger tanur ka asüba ajanga ozü tanur meyipa bener marur."

Iba senden nung United Nations Secretary-General António Guterres-ia Gaza nung tensa ya magizükteter aser iba azüdokshi anentsü lenmang ajak agi two-state solution ya dang lir, ta ashi.

Linük balalai two-state solution ya shidak ta telemtetba agiba pela agizükba mapang, Hamas-i October 7 nü azüdokshiba mesüra pua bener aoba kecha agia memedentsütsü, ta pai ashi.

"Aser telok balalai Palestine nunger merenshiba memedentsütsü," ta paisa ashi.

Palestine nunger nem linük temeja agütsüba ya Hamas asoshi sempet agütsür ama asütsü ta Israel aser US-i jembiba dak sendakba nung, "ibai sempet masü par temeden lir," aser aji melira region nung yimjung malitsü, ta UN tekolakbai ashi.



# NSF MM Trophy 2025 : Football 4 Change-i asaya kokogo



**Kohima, Rongjui/September 23 (TYO):** Mongolbarnü 25buba NSF Martyrs Memorial Trophy nung Football 4 Change-i Sechü Zubza Football Academy

kokogo. Iba asayamung ya Naga Students Federation aser Angami Students Union nati ayongzüka asayadar. Chumoukedima Football Stadium nung asaya ti asayatsü

aliba nungi mezügbuba asaya nung Football 4 Change Manipur-i goal 5-2 agi Sechü Zubza Football Academy koka liasü. F4C atema mezügbuba

goal Nehminlun-i minute 25buba nung idaktsü aser Lungin-i minute 40 aser 58buba nung goal ana idakja liasü. Maneni Alpha-ia Minute 80 aser 90+1buba nung goal ana

idaktsü.

Sechü Zubza FA atema goal ana ya Rokosalie Nipu-i minute 85 aser Vimeyieto-i Nipu 90+4buba nung idakja liasü.

Asaya nung man of the match naroküm ya Football 4 Change nungi Adelson nem Chumoukedima Football Stadium Committee aser convenor Kevizayie-i agütsü.

Iba asaya atema match patron ji taoba NSF tir Subenthung Kithan liasü.

**September 24 nü asaya:**

Venue: Chumoukedima

Football Stadium

Dimapur Chaos vs Phesazou

SC Chiechama @ 5pm.

## India semdangba mapang Argentina team Australia den asayatsü akok

**Rongjui/September 23, 2025 (Agencies):** Argentine national team shirnok November ita Kerala-i arua asayatsü lir, parnok Australia den exhibition asaya ka asayatsü akok, ta osang ajanga metetdaksüogo.

Ballon d'Or ti koker alisang Lionel Messi-i aniba Argentina team, shirnok November 15 nü India-i arutsü lir, parnok Australia den Kaloer Stadium nung asayatsü, ta osang ajanga metetdaksüogo.

Asaya ya mezügbu Thiruvananthapuram nung Karyavattom Greenfield Stadium nung asayatsü liasü, saka tang Kochi nung Kaloer Stadium nung asayatsü ta officially jangjashitsüogo.

Kerala Sports Minister V. Abdurahiman-i tawa sangdong ka ajanga, manager Lionel Scaloni kübok Messi-i aniba

Argentina national football team ya November ita Kerala nung friendly ka asayatsü, ta metetdaksür liasü. Argentina team linük balala nung asaya-a senzuba nung shilem ka ama India nunga asayatsü lir. Parnok Luanda aser Angola na nunga asayatsü.

Abdurahiman-i pa indang official Facebook account ajanga ashiba agi, "Messi arutsü. Official mail ajanga Official osang agizükba nung Lionel Messi densema Qatar World Cup akokba Argentina team FIFA International Window mapang November ita friendly ka asayatsü atema Kerala-i arutsü."

Messi-isa, December 13 nungi 15 tsüngda Kolkata, Mumbai aser New Delhi semdangtsü imlar. Iba tour nüngja ya 'GOAT Tour Of India

2025' ta agütsüogo.

2011 küm sülen tang mezügbuba Messi-i India semdangtsü lir. 2011 küm pai anir Argentina team Kolkata Salt Lake Stadium nung Venezuela den friendly ka asaya koba parnoki goal 1-0 agi koka liasü.

Pai Kolkata nung asayaba ya yimti nung aliba nüburtemi tang tashi bilemteter aser taküm December ita-a pai iba yimti tama semdangtsü. India nung fan tem atema World Cup champion ya tejak o tejak na chitepa ajuruteptsü asoshi maongka tajung ka asütsü.

Messi India-i aruba mapang Maharashtra Sports Department-i state kübok tesem balala nungi under-14 football asayatem shima December 14 nü Messi den practice asütsü maongka agütsütsü.

## MDFA Trophy October 14 nü nungi asayatsü

**Dimapur, Rongjui/September 23 (TYO):** Mokokchung District Football Association (MDFA)-i sangdong ka ajanga, MDFA Trophy, 2025 October 14 nü nungi tenzüka Imkongmeren Sports Complex, Mokokchung nung asayatsü ta metetdaksüogo.

Asayamung atema renemshiba mapang MDFA-i, iba asayamung atema ticket ayoktsü asoshi contract

agizüktsü jangraratem dang application benoktsü jaokogo.

MDFA kübok züngoksema aliba club mesüra association tem shirnok taoba küm tashi MDFA Trophy nung shilem agiogo parnoki dang iba contract atema apply sütettsü, ta kasa sangdong ajanga metetdaksü.

Application tem ya September 30 nü tashi nungbo MDFA office nung benoktsü metetdaksüogo.

## Dembele aser Bonmati nati Ballon d'Or agizükogo

**Rongjui/September 23, 2025 (Agencies):** Paris Saint-Germain forward Ousmane Dembele nem 2025 küm atema Ballon d'Or agütsüogo. PSG puri mezügbuba UEFA Champions League title abenba aser domestic league nung asayamung tongtibangtiba anaprongla akokba nung tongtibang shilem agiba sülen pa nem iba naroküm agütsüogo.

Arisi küm 28 tain France nunger asayar yagi tetoktepba ajak nung goal 37 idaktsü aser assist 15 süja liasü. Pai Barcelona nungi asayar Lamine Yamal aser PSG teammate Vitinha na ajateta iba naroküm nguogo.

"Iba naroküm anguba ya jangrademtsüka. Iba ya kü teammate tem den longjem inyakba ajanga ngutetba lir. Champions League akokba ajanga ajak melenshidaktsü," ta Dembele-i ashi.

Tetsürtem rongnung Spain tsür Aitana Bonmatí nem taküm agi küm asemubaba atonga Ballon d'Or agütsüogo aser iba ajanga la ya alima nung tetsür football asayatem rongnung tajungtiba ta tali jangjashitsüogo. Iba naroküm atema lai teammate Mariona Caldentey ajateta liasü.

**Ballon d'Or 2025 sentong nung takok angurtem:**

\* Men's Ballon d'Or: Ousmane Dembele (France, Paris Saint-Germain)

\* Women's Ballon d'Or: Aitana Bonmatí (Spain, Barcelona)

\* Men's Kopa Trophy (best young player): Lamine Yamal (Spain, Barcelona)

\* Women's Kopa Trophy: Vicky López (Spain, Barcelona)

\* Men's Yashin Trophy (best goalkeeper): Gianluigi Donnarumma (Italy, PSG)

\* Women's Yashin Trophy: Hannah Hampton (England, Chelsea)

\* Men's Gerd Müller Trophy (top scorer): Viktor Gyökeres (Sweden, Sporting CP/Arsenal)

\* Women's Gerd Müller Trophy: Ewa Pajor (Poland, Barcelona)

\* Men's Johan Cruyff Trophy (best coach): Luis Enrique (Spain, PSG)

\* Women's Johan Cruyff Trophy: Sarina Wiegman (Netherlands, England national team)

\* Men's Club of the Year: Paris Saint-Germain

\* Women's Club of the Year: Arsenal

\* Sócrates Award: Fundación Xana (Spain)

69buba Ballon d'Or sentong ya September 22 nü Paris kübok Théâtre du Châtelet nung agia liasü. Iba award ya 1956 küm nungi France Football-i agüja arudar aser football asaya nung tetushi rongnung tematiba ta züngshir.

Taküm agi küm anabuba atonga UEFA-i iba sentong ya France Football aser L'Équipe kibur Groupe Amaury den longiemer ayongzüka agiogo.

## KDVA asayamung nüngja G. Rio Memorial Volleyball Trophy agi melenogo



September 22 nü Kohima nung senden amenba mapang KDVA ketdangsürtem aser organizing committee zünsemtem tangokba noksa nung angur.

**Kohima, Rongjui/September 23 (TYO):** Kohima District Volleyball Association (KDVA)-i, "Kohima Open Volleyball Tournament" nüngja ya taküm nungi tenzüka "G. Rio Memorial Volleyball Trophy" ta nüngja melener asayatsü telemtetba agiogo.

Iba asayamung ya taküm agi 12benbuba asayatsü renemdar.

Taküm iba asayamung atema ajak senteper senpet sen

4,60,000 agütsütsü, kong jurila sempettem, kuli kaket aser takok marok densema lir.

Kohima nung KDVA aser asayamung ayongba committee na senden ka amenba mapang, taküm iba asayamung ya October ita tatembangbuba hopta nung asayatsü telemtetba agia liasü.

Iba dak sendakba nung KDVA-i volleyball asaya jangraratem, asayatem aser

team tem taküm iba asayamung atema renema alitsü metetdaksüogo.

Kasa mapang nung KDVA-i Mhalelhou Mere convenor sür organizing committee tentettsüogo. Committee nung Rukravolie Rulho co-convenor, Dr. Keneikhoto Yano- secretary, Khriesamhalie Daniel Solo-treasurer, Visasielie Suhu- ex-officio aser Khrietuo Dahou o Vitso Rio na züngsem asütsü.

## BILEMDANGANG

**"Temang manemi kümra teblemstü ajak agi ka dang akümer."**